



MINNISBLAÐ

Viðtakandi: Skóla- og frístundaráð

Sendandi: Steinn Jóhannsson, sviðsstjóri skóla- og frístundasviðs

Starfsáætlanir frístundamiðstöðva starfsárið 2025-2026

Hér eru lagðar fram starfsáætlanir fjögurra frístundamiðstöðva skóla- og frístundasviðs, Brúarinnar, Kringlumýrar, Miðbergs og Tjarnarinnar.

Frístundamiðstöðvar skóla- og frístundasviðs (SFS) starfa eftir *Menntastefnu Reykjavíkurborgar til 2030* sem hefur þá framtíðarsýn að í kraftmiklu skóla- og frístundastarfi öðlist börn og unglingar menntun og reynslu til að láta drauma sína rætast og hafa jákvæð áhrif á umhverfi og samfélag. Frístundamiðstöðvarnar vinna jafnframt út frá *Stefnu um frístundapjónustu í Reykjavík til 2025*, en leiðarljós hennar er að Reykjavíkurborg bjóði upp á fjölbreytta og heilsuefandi frístundapjónustu sem hvetur til virkrar þátttöku, sköpunar og betra samfélags. *Starfsskrá frístundamiðstöðva SFS* (2015) er svo kjölfesta þess starfs sem fram fer á vegum frístundamiðstöðva og skipar veigamikinn sess, ásamt starfsáætlun ár hvert, við framkvæmd og skipulag frístundastarfs fyrir börn og unglinga í Reykjavík. Starfsskráin er í endurskoðun og stefnt er á endurútgáfu hennar árið 2026.

Í tengslum við innleiðingu á Menntastefnunni er nú unnið eftir [Almennum aðgerðum menntastefnu Reykjavíkur 2025-2027](#) og hafa framkvæmdastjórar frístundamiðstöðva og frístundaskrifstofa ákveðið að frístundastarfið setji ákveðnar aðgerðir þar í forgang. Lögð verður áhersla á að auka fræðslu og símenntun um menningarnæmi og fjölmenningu og að stuðla að meiri fjölbreytni í fyrirmyndum í starfsmannahópnum. Fræðslan *Fjölmennung til framtíðar* fer fram á öllum frístundamiðstöðvum haustið 2025 og starfsstaðir hvattir til að leita til MML og MEMM eftir fræðslu á þessu sviði. Lögð verður áhersla á skapandi vinnu í gegnum tónlist, leiklist, sjónlist, kvikmyndalist og hönnun. Þá verði sérstaklega horft til þess að nota leiki sem námsleið. Foreldrasamstarfið verður eflt og hvatt er til þess að verkefni eins og *Foreldrahermirinn* fari fram í öllum félagsmiðstöðvum. Hlúð verður að óformlegum samskiptum og stuðlað að betri tengslamyndun meðal barna og unglinga. Sérstök áhersla verður lögð á starf fyrir 10-12 ára hópinn. Kyn- og kynjafræðsluverkefni Jafnréttisskólans verða innleidd. Þá verður lögð áhersla á aukinn sýnileika bókakosts og samstarf við bókasöfn. Leitað verður leiða til að auka samstarf skóla- og frístundastarfs um áhugasviðsverkefni og frístundalæsi markvisst nýtt til að styrkja læsispróun barna í gegnum leik og skapandi starf. Þá verður lögð áhersla á fræðslu um stafræna borgaravitund og fræðslu til að efla stafræna hæfni starfsfólks þar sem ráðgjöf og búnaður verði fengin frá Mixtúru.

Til viðbótar við þessi stefnuskjöl sem frístundamiðstöðvarnar vinna eftir er tekið mið af lögum og reglugerðum, upplýsingum um þátttöku í starfinu, niðurstöðum kannana um starfið og rannsóknum á stöðu barna og unglinga í hverfum borgarinnar. Að auki er unnið að innleiðingu



laga um samþættingu þjónustu í þágu farsældar barna og verkefninu Betri borg fyrir börn, sem er leið Reykjavíkurborgar við að innleiða farsældarlögin og miðar að því að bæta þjónustu við börn, ungmenni og fjölskyldur þeirra.

Tilgangur starfsáætlana er að gera starf frístundamiðstöðva markvissara með árangursmiðuðum markmiðum og umbótamiðuðu innra mati. Starfsáætlanir eru birtar opinberlega og gefa starfsfólki, foreldrum og rekstraraðilum meðal annars upplýsingar um hvernig starf frístundamiðstöðvanna gekk á síðasta starfsári, hvernig unnið verði að mati, umbótum og innleiðingu á áherslum úr menntastefnu og frístundastefnu á starfsárinu og hvaða þróunarverkefnum verður unnið að. Í starfsáætlunum eru einnig birtar jafnréttisáætlanir frístundamiðstöðvanna sem nú eru unnar út frá *Aðgerðaráætlun Reykjavíkurborgar í jafnréttis- og mannréttindamálum 2023-2026*.

Starfsáætlanirnar gilda frá 1. september 2025 til 31. ágúst 2026. Frístundaheimili og félagsmiðstöðvar gera aðgerðaráætlanir fyrir starfsárið út frá starfsáætlunum frístundamiðstöðva. Fyrirhugað er að fara að styðja betur við innra mat frístundaheimila og félagsmiðstöðva og ætlunin er að það endurspeglist í aðgerðaráætlunum 2026-2027 sem verða umbótamiðaðri en áður.